



Nakorsat kigutillu nakorsai kalaaliusut sooq ilinniagartik arlalitsigut nunatsinni atornagu nunattali avataani atortarneraat kvalitativiusumik misissorneqarnissaanik Naalakkersuisut peqquneqassasut Inatsisartut aalajangiiffigisassaattut siunnersuut.

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Demokraatit inatsisartunut ilaasortaataannut Anna Wangenheim-imut siunnersuummut kusanartumut qujanaq.

Uani misissoqqullugu kissaatigaa, sooq nakorsat kigutillu nakorsai kalaaliusut sooq ilinniagartik arlalitsigut nunatsinni atornagu nunattali avataani atornissaat kissaatigisarneraat.

Naliginnaaleriartorpoq, nunarsuarmi pisunut paasinnikkiartornerput aammalu kisitsisit aamma kisitsisit atorlugit nassuiaasiernerisa ataqatigiinnerat. Tamakku atortarpagut tamatta annerusumik minnerusumilluunnit eqqoriarsinnaaniassagatsigu, sooq pissutsit taamaannerat.

Demokraatit inatsisartunut ilaasortaataat Anna Wangenheim uani siunnersuuteqarpoq, allatut iliussasugut. Siunnersuutigaa, inuit oqaloqatigissagigut ajornartorsiutaasinnaasut ersarissumik akissutissarsiniarlugit. Isumaqarpunga, siunnersuut pitsassuusoq. Sulilu pitsaaneruvoq, piviusorsiortuummat, innuttammi amerlasusaat amerlavallaanngimmat.

Qanormi nuannertigissagaluarpa paasilluassallugu, sooq kalaallit pikkorissorsuit nunaminnut uterusunnginnerat paasissallugu.

Ajoraluartumilli takoqqipparpunaasit Naalakkersuisut, isummernissaminnut ersinerat. Naalakkersuisut utaqqerusunneruaat, Peqqinnissaq pillugu ataatsimiititaliarsuup suliainik naammassinninnissaa. Qaa; isumaqanngilanga, ataatsimiititaliarsuup suliaanut ajoqusiissalluta misissuineq una aallartikkutsigu. Misissuinermi aamma tikkuutitut pitsaasutut atorneqarsinnaavoq, sooq nakorsat kigutillu nakorsat kalaaliusut nunani allani najugaqarnissartik toqqartaraat.

Demokraatit kajumissaarutigiinnarsinnaavaat piaarnerpaamik misissuinerup taassuma aallartinneqarnissaa.

Taamatut oqaaseqaateqarluta Demokraatit inatsisartunut ilaasortaataannit Anna Wangenheim-imit siunnersuutip akuersissutigineqarnissaa Ilaqutariinnermut- aamma Peqqissutsimut ataatsimiititaliami suliareqqitassanngorlugu innersuussutigaarput.